



---

**-SENAT-**

Broj: 01-15-29/23

Sarajevo, 27. 09. 2023. godine

Na osnovu člana 61. Zakona o visokom obrazovanju („Službene novine Kantona Sarajevo“, broj 36/22) i člana 64., a u vezi sa članom 294. Statuta Univerziteta u Sarajevu, broj: 01-14-35-1/23 od 26. 07. 2023. godine, a u vezi sa upitom Ministarstva za nauku, visoko obrazovanje i mlade Kantona Sarajevo broj: 27/03-30-28947-1/23 od 25. 07. 2023. godine, a u cilju osiguranja jednakosti u mogućnostima i tretmanu u pogledu izbora u isto ili više akademsko zvanje na Univerzitetu u Sarajevu, Senat Univerziteta u Sarajevu na 61. redovnoj sjednici održanoj 27. 09. 2023. godine, donosi sljedeće

**U P U T E**

*o realizaciji izbora u isto ili više akademsko zvanje na Univerzitetu u Sarajevu  
u skladu sa uslovima propisanim ranijim Zakonom*

**I****(Predmet)**

Predmet Uputa o realizaciji izbora u isto ili više akademsko zvanje na Univerzitetu u Sarajevu u skladu sa uslovima propisanim ranijim Zakonom (dalje u tekstu: Upute) je bliže uređivanje toka izbora u isto i više akademsko zvanje na Univerzitetu u Sarajevu u skladu sa uslovima propisanim Zakonom o visokom obrazovanju („Službene novine Kantona Sarajevo“, br. 33/17, 35/20, 40/20 i 39/21), u vezi sa uslovima koji su se primjenjivali na Univerzitetu u Sarajevu do donošenja Statuta Univerziteta u Sarajevu, broj: 27/03-30-28947-1/23 od 25. 07. 2023. godine, a koji se ne odnose na započete postupke izbora u isto ili više akademsko zvanje.

**II****(Bliže određeni uslovi)**

- (1) Naučni, umjetnički i stručni doprinosi, kao jedan od obaveznih uslova za izbor u akademska zvanja, su:
- objavljena knjiga,
  - objavljeni naučni radovi,
  - objavljeno ili prihvaćeno izlaganje (referat) sa naučnog skupa (na domaćim i međunarodnim simpozijima, naučnim i stručnim skupovima i dr.),
  - učešće u naučnom projektu/naučnoj studiji u skladu sa Zakonom o naučnoistraživačkoj djelatnosti Kantona Sarajevo i
  - učestvovanje u domaćim ili međunarodnim naučnim ili stručnim skupovima koje organizira Univerzitet odnosno fakultet/akademija, a koje se dokazuje određenim certifikatom.

- (2) Radovi iz stava (1) tač. b) ovih Uputa smatrat će se relevantnim ukoliko su objavljeni u domaćim ili međunarodnim priznatim publikacijama koje se nalaze u naučnim bazama podataka definiranim u registru relevantnih naučnih baza podataka.
- (3) Naučni rad kao uvjet za izbor u akademsko zvanje smatra se objavljenim ukoliko je u elektronskoj ili printanoj formi dostupan javnosti prije isteka roka za predaju prijave na konkurs za izbor u akademsko zvanje. Komisija za pripremanje prijedloga za izbor je u svom izvještaju obavezna precizno naznačiti datum izvršenog uvida u naučni rad koji je dostupan u elektronskoj formi. Sastavni dio izvještaja komisije za pripremanje prijedloga za izbor predstavlja ispis o izvršenom elektronskom uvidu u rad.
- (4) U postupku izbora u akademsko zvanje naučni rad može se smatrati objavljenim i u slučaju kada je od izdavača časopisa izdata zvanična potvrda/obavijest da je rad prihvaćen za objavu sa naznakom datuma objave naučnog rada, a kao datum izdavanja rada smatra se datum izdavanja takve potvrde odnosno obavijesti. Potvrdu/obavijest da je rad prihvaćen za objavu sa naznakom datuma objave naučnog rada kandidat obavezno prilaže i dostavlja u svojoj aplikaciji na konkurs.
- (5) U slučaju iz stav (4) ovih Uputa izabrani član akademskog osoblja je obavezan najkasnije sedam dana od datuma određenog za objavu naučnog rada dostaviti dokaz rukovodiocu fakulteta/akademije da je rad objavljen. Ukoliko član akademskog osoblja ne dostavi dokaz da je rad objavljen, rukovodilac fakulteta/akademije je obavezan pokrenuti postupak oduzimanja akademskog zvanja.
- (6) Rukovodilac fakulteta/akademije je obavezan nakon zaprimanja odluke o izboru u akademsko zvanje uspostaviti evidenciju kandidata kojima su radovi prihvaćeni u skladu sa stavom (4) ovih Uputa i zadužiti sekretara fakulteta/akademije da prati realizaciju obaveza izabranog člana akademskog osoblja iz stava (5) ovih Uputa.
- (7) U postupku izbora u akademska zvanja kao rad koji je objavljen u skladu sa stavom (4) ovih Uputa mogu se prihvatiti najviše dva rada.
- (8) Pokazani rezultati u nastavnom radu ocjenjuju se na osnovu rezultata evaluacije, održanih predavanja na drugim univerzitetima, ocjena angažiranosti nastavnika u razvoju i inoviranju nastavnog programa, zainteresiranosti studenata za izbor predmeta, uspjeha u napredovanju nastavno-naučnog i nastavno-umjetničkog podmlatka i sl.
- (9) Projekat, originalni stručni uspjeh, patent i originalni metod je izum u struci koji do sada nije otkriven ili postignut i koji ima kao rezultat nova rješenja u praksi koja se temelje na nekoj naučnoj ili umjetničkoj oblasti.
- (10) Univerzitetska knjiga je publikacija posebne namjene koja služi obavljanju nastavnih djelatnosti i ima karakter univerzitetskog izdanja, odnosno izdanja članice.
- (11) Katalogiziranom publikacijom smatra se ona publikacija koja je opremljena CIP-om (katalogizacija u publikaciji) od nacionalne biblioteke u čijoj zemlji je obavljena i oznakom u međunarodnim sistemima trajne identifikacije (ISBN, ISSN, DOL i sl.).

### III

#### *(Sadržaj pojmova/uslova za izbor u nastavno-umjetnička zvanja)*

- (1) Javno predstavljani oblici umjetničkog stvaralaštva podrazumijevaju i umjetnička djela koja su predstavljena široj javnosti (javna izvedba, izložba i dr. oblici javnog umjetničkog djelovanja sa

autorskim/koautorskim ili izvođačkim učešćem) i koja su vrednovana (stručne kritike, nagrade i sl.).

- (2) Priznanje u odgovarajućoj oblasti umjetnosti podrazumijeva domaće i međunarodne nagrade ostvarene na relevantnim smotrama i festivalima isključivo za kvalitet umjetničkog djela ili ukupno djelovanje u određenoj oblasti umjetnosti, kao i pozive za učešće na međunarodnim i domaćim festivalima i smotrama umjetničkog stvaralaštva, te pozive za gostovanja na drugim akademijama, značajnim projektima i radionicama.
- (3) Doprinos razvoju kulture i umjetnosti kao i uspješni angažmani u stručnim organizacijama koje su značajne za razvoj kulture odnosno određene oblasti umjetnosti, te vođenje umjetničkih projekata i radionica.
- (4) Doprinos u podizanju nastavnog i umjetničkog kadra ocjenjuje se na temelju uspjeha u napredovanju nastavno-umjetničkog akademskog osoblja i umjetnika putem mentorstva u nastavnom radu i umjetničkim projektima.

#### IV

##### *(Ekvivalencija/supstitucija)*

- (1) U slučaju da kandidat pri izboru u akademsko zvanje iz objektivnih razloga nije mogao ispuniti uslov vezan za: a) objavljenju knjigu i/ili b) mentorstvo za drugi i/ili treći ciklus studija odnosno integrirani studij, uvodi se ekvivalencija odnosno supstitucija za objavljene knjige i/ili mentorstva sa tri dodatna naučna rada objavljena u relevantnim bazama podataka u odnosu na minimalne uvjete utvrđene Zakonom o visokom obrazovanju ("Službene novine Kantona Sarajevo", br. 33/17, 35/20, 40/20 i 39/21).
- (2) Za ekvivalenciju odnosno supstituciju za objavljene knjige i/ili mentorstva iz prethodnog stava ovih Uputa računa se i uspješno vođenje međunarodnog/domaćeg projekta od značaja za Univerzitet/članicu.
- (3) Mentorstvo kao uvjet za izbor u odgovarajuća akademska zvanja podrazumijeva uspješno mentorstvo na drugom i trećem ciklusu studija/integriranom studiju, odnosno mentorstvo ostvareno u postupku stjecanja naučnog stepena magistra nauka ili doktora nauka po predbolonjskom sistemu, a što za rezultat ima uspješno odbranjen završni rad odnosno magistarski rad/doktorsku disertaciju.
- (4) Objektivni razlozi za neispunjavanje uvjeta mentorstva iz stava (1) ovih Uputa su:
  - a) ako na fakultetu/akademiji nije organiziran studij drugog i trećeg ciklusa odnosno postdiplomskog studija zbog nedovoljnog interesa kandidata za upis,
  - b) ako nijedan kandidat nije prijavio temu završnog rada odnosno magistarskog ili doktorskog rada iz naučne oblasti za koju se vrši izbor,
  - c) ako zbog broja kandidata u datom vremenskom periodu kandidat za izbor u određeno akademsko zvanje nije određen za mentora i
  - d) ako kandidat drugog/trećeg ciklusa studija ne završi studij u odgovarajućem roku, odnosno roku koji se podudara sa periodom pokretanja procedure za izbor nastavnika u isto ili više akademsko zvanje, a koji je imenovan za mentora.
- (5) Pod objektivnim razlogom neispunjavanja uvjeta objavljene knjige smatra se kada ne postoji pisani zahtjev stariji od jedne godine od nadležne katedre o potrebi za pisanjem knjige za predmete koje je kandidat za čije napredovanje je raspisan konkursa za izbor držao u tekućem

izbornom periodu. Pisani zahtjev za pisanje knjige za određeni predmet nadležna katedra obrazlaže nedostatkom adekvatne domaće ili strane literature za taj predmet.

- (6) Izuzetno, poglavlje knjige/zbornika objavljeno kod izdavača kategorije A prema CERES/EADI listi može supstituirati jedan naučni rad u publikacijama indeksiranim u relevantnim bazama podataka, dok poglavlje u knjigama/zbornicima domaćih izdavača ili izdavača nižih kategorija prema CERES/EADI listi može supstituirati jedan naučni rad u priznatim publikacijama.

## V

### *(Prijevremeni izbor u više akademsko zvanje)*

- (1) Član akademskog osoblja u zvanju docenta i vanrednog profesora može biti izabran u više zvanje i prije isteka perioda na koji je biran ukoliko ispuni uvjete za izbor u više akademsko zvanje i ako je proveo u nastavi najmanje tri godine nakon posljednjeg izbora te ukoliko je od propisanih radova za izbor u više zvanje za vanrednog profesora dodatno objavio najmanje tri naučna rada u citatnim bazama podataka, odnosno ako je od propisanih radova za izbor u više zvanje za redovnog profesora dodatno objavio najmanje pet naučnih radova u citatnim bazama podataka.
- (2) Član akademskog osoblja u zvanju asistenta može biti izabran u zvanje višeg asistenta i prije isteka perioda na koji je biran ukoliko ispuni uvjete za izbor u zvanje višeg asistenta i ako je proveo u nastavi najmanje dvije godine nakon posljednjeg izbora, te ukoliko je od propisanih uvjeta za izbor u zvanje višeg asistenta dodatno objavio najmanje dva naučna rada u oblasti za koju se bira ili ako je u nastavi proveo najmanje dvije godine i upisao treći ciklus studija i uspješno izvršio sve svoje obaveze i položio sve ispite sa prve godine ovog studija.
- (3) U slučaju prijevremenog izbora u više akademsko zvanje član akademskog osoblja ostvaruje pravo na ekvivalenciju odnosno supstituciju za objavljenu knjigu i/ili mentorstvo za drugi i/ili treći ciklus studija odnosno integrirani studij, u skladu sa takom IV ovih Uputa.

## VI

### *(Pristupno predavanje)*

- (1) Kandidat za izbor u akademsko zvanje docenta koji nije sudjelovao u realizaciji nastavnog procesa obavezan je da održi pristupno predavanje iz nastavnog predmeta ili uže naučne odnosno umjetničke oblasti za koju je konkurirao.
- (2) Pristupno predavanje održava se pred studentima fakulteta/akademije na kojem/kojoj se provodi postupak izbora i komisijom za pripremanje prijedloga za izbor.
- (3) Pristupno predavanje održava se za studente one akademske godine (odnosno usmjerenja) na kojoj se izučava nastavni predmet odnosno uža naučna ili umjetnička oblast.
- (4) Ukoliko neki od članova komisije iz stava (2) ovih Uputa iz opravdanih razloga bude spriječen da prisustvuje pristupnom predavanju kandidata, vijeće fakulteta/akademije imenovat će njegovog zamjenika prema istim uvjetima kao i za imenovanje člana komisije.
- (5) Vrijeme i mjesto održavanja pristupnog predavanja vijeće fakulteta/akademije javno oglašava na oglasnoj ploči fakulteta/akademije.
- (6) Uspješnost pristupnog predavanja kandidata ocjenjuje komisija za pripremanje prijedloga za izbor uzimajući u obzir rezultate ocjene predavanja od studenata.
- (7) Studenti daju ocjenu o pristupnom predavanju kojem su prisustvovali na temelju vrednovanja sposobnosti kandidata da izloži materiju iz ugla razumljivosti i metodološke prilagođenosti

slušaocima i tu ocjenu uvažava komisija i sastavni je dio izvještaja koji se dostavlja vijeću fakulteta/akademije.

## VII

### *(Primjena procesnih pravila)*

U postupku izbora u akademsko zvanje prema uslovima utvrđenim Zakonom o visokom obrazovanju ("Službene novine Kantona Sarajevo", broj 33/17, 35/20, 40/20 i 39/21), koji prestao da važi, primjenjuju se procesna pravila u pogledu rokova i drugih faza u ovom postupku koja su utvrđena važećim Zakonom o visokom obrazovanju.

## VIII

### *(Započeti postupci)*

- (1) Početak procedure izbora u isto ili više akademsko zvanje na Univerzitetu u Sarajevu vezuje se za raspisivanje odnosno javnu objavu konkursa.
- (2) Postupci započeti u vrijeme važenja Statuta Univerziteta u Sarajevu, broj: 01-1093-3-1/18 od 28. 11. 2018. godine, sa pripadajućim izmjenama i dopunama, okončat će se u skladu sa njegovim odredbama.

## IX

### *(Stupanje na snagu i primjena)*

Ove Upute stupaju na snagu danom donošenja i primjenjuju se do donošenja Pravilnika o izborima u akademska zvanja Univerziteta u Sarajevu.

*R*REKTOR  
*H*Škriješć  
**Prof. dr. Rifat Škriješć**



Dostaviti:

- ☉ Fakulteti/akademije Univerziteta u Sarajevu
- Ministarstvu za nauku, visoko obrazovanje i mlade Kantona Sarajevo
- U dokumentaciju Senata
- Arhivi